



DIARIO DE SESIÓNS DO PARLAMENTO DE GALICIA

Número 46

VII lexislatura

Serie Pleno

Sesión plenaria **21 de xuño de 2006**

Presidencia da Excma. Sra. D.^a Dolores Villarino Santiago

ORDE DO DÍA

(Continuación.)

(Versión electrónica en www.parlamentodegalicia.es)

Reiníciase a sesión ás dez e dous minutos da mañá.

Pregunta dirixida ó Sr. presidente da Xunta de Galicia de D. Alberto Núñez Feijoo, do G.P. Popular de Galicia, sobre o balance do Sr. presidente da Xunta de Galicia respecto da política de vivenda que está a aplicar o Goberno galego. (Punto sétimo da orde do día.)

Intervención do autor: *Sr. Núñez Feijoo (P)*. (Páx. 12.)

Contestación do presidente da Xunta: *Sr. Pérez Touriño*. (Páx. 13.)

Réplica do autor: *Sr. Núñez Feijoo (P)*. (Páx. 14.)

Réplica do presidente da Xunta: *Sr. Pérez Touriño*. (Páx. 15.)

Reiniciase a sesión ás dez e dous minutos da mañá.

A señora PRESIDENTA: Bos días, señoras deputadas e señores deputados.

Reiniciamos a sesión plenaria co punto sete da orde do día, de preguntas para resposta oral do presidente da Xunta de Galicia.

Pregunta dirixida ao Sr. presidente da Xunta de Galicia, de D. Carlos Aymerich Cano, do G.P. do Bloque Nacionalista Galego, sobre as modificacións previstas para garantir o exercicio do dereito a voto dos emigrantes e mariñeiros galegos

A señora PRESIDENTA: Para formular a pregunta, ten a palabra o señor Aymerich Cano.

O señor AYMERICH CANO: Moitas grazas, señora presidenta.

Señor presidente, hai un ano, o 21 de xuño de 2005, os galegos aínda non coñeciamos o resultado das eleccións celebradas dous días antes. Aínda houbemos de agardar unha semana máis, até o día 28, para cerciorármolos de que o señor Manel Gallego ía sentar neste hemiciclo e que con el íamos ter tamén un novo goberno que agora está sentado no banco azul. Mais, aínda que penso que isto é agora o que interesa, hai un ano tamén moitos galegos e galegas se decataron, descubriron, atónitos, que mentres un traballador galego en Fuerteventura non ten dereito a votar en Galiza, o neto dun emigrado a Buenos Aires si o ten, e afortunadamente. O problema é que moita xente vota en lugar deste emigrado galego a Buenos Aires. Normalmente non é el quen vota persoalmente.

A prensa galega deu conta naqueles días de xuño da mecánica da fraude. Axentes electorais, cunha copia do censo na man –que, por certo, aínda está a espera de ser depurado– van ao domicilio do elector, recollen a documentación enviada de oficio pola administración electoral e, indo á oficina de correos máis próxima, votan por el. Hai outra versión, aquela na que o Partido Popular inserta un anuncio na empresa que di: “*Gallego del Uruguay ven a votar a la sede del Partido Popular*”; é dicir, que alí quedan os votos. O que pase despois con eles cada un que o imaxine.

Hoxe, un ano despois, descubrimos ademais que en materia electoral a calidade democrática do Estado español é inferior á de Perú, e só me refiro á materia electoral. Hai só quince días todos puidemos ver como os cidadáns de Perú residentes no Estado español votaban en colexios electorais, emitían o seu voto nunha urna con apoderados e interventores designados polas diferentes candidaturas.

E se falamos do voto dos mariñeiros, embarcados en buques de altura –case 10.000 do noso país–, o problema, desde logo, segue sen resolver. Aquí parece que son os Estados Unidos os que nos dan leccións en materia electoral. Alí, nos Estados Unidos, votan até os astronautas, por non falar xa dos militares destacados en Iraq ou en Afganistán. No Estado español os máis de 10.000 mariñeiros galegos da frota de altura non teñen dereito a votar, e fóra de experimentos piloto como o do Novo Laredo –experimentos piloto que logo non teñen ningunha validez–, seguen á espera de ser cumpridas iniciativas aprobadas, por exemplo, a instancias do Bloque Nacionalista Galego no Congreso dos Deputados no ano 2001. Seguimos esperando a que se reforme a Lei orgánica do réxime electoral xeral para que os mariñeiros poidan votar –pensamos que no ano 2006 xa non valen excusas de tipo técnico– e, desde logo, para que os emigrantes galegos poidan tamén votar en condicións de seguridade, de segredo de voto e de liberdade, cuestión que aínda hoxe a Lei orgánica do réxime electoral xeral non garante. Por iso, a pregunta é: ¿que medidas se van adoptar? ¿Que medidas pensa vostede que vai adoptar o Goberno español para que os mariñeiros e os emigrantes galegos poidan votar con seguridade e con liberdade nos próximos procesos electorais?

Moitas grazas.

A señora PRESIDENTA: Moitas grazas, señor Aymerich.

Ten a palabra o señor presidente da Xunta.

O señor PRESIDENTE DA XUNTA DE GALICIA (Pérez Touriño): Grazas, presidenta.

Señoría, sen dúbida, as dúas cuestións que trae hoxe aquí teñen unha especial transcendencia para Galicia, afectan ao exercicio dos dereitos cívicos de dous colectivos que teñen un

singular significado: os galegos da emigración e os galegos do mar. En ambos aspectos o Goberno galego conxuntamente coa Administración Central está dando pasos para mellorar de xeito substancial a situación actualmente existente.

Concordo con vostede nas limitacións actuais e na necesidade inequívoca e imperiosa de cambiar o marco regulatorio que permita solucionar ambos os dous problemas. Sen dúbida, todos temos gravado o recordatorio que vostede acaba de facer do último evento electoral e todo o que aconteceu en relación coa participación e o voto dos emigrantes. Iso ten unha resposta inequívoca que se chama voto en urna, que é como se vota en democracia de maneira regular en todo caso.

Neste senso, quero dicirlle, en primeiro lugar, que sobre o marco en que se desenvolveran as accións que tanto o Goberno central como o Goberno galego deben levar a cabo para garantir plenamente a igualdade de dereitos e de deberes dos nosos emigrantes entendo que é o Estatuto dos Cidadáns Españois –polo tanto, galegos–, no Exterior, que actualmente está en fase de tramitación no Congreso dos Deputados con carácter de lei, o que dará a resposta da Administración pública ás demandas dos galegos e dos españois residentes no exterior, recollendo por primeira vez no anteproxecto de lei que está en tramitación os seus dereitos nunha norma, como digo, con ese carácter, comezando, en primeiro lugar, polo dereito a voto en urna, recollido no artigo 4.5 do Estatuto, no que se establece que se promoverán todas as medidas legais tendentes a homoxeneizar os procedementos electorais dos electores residentes ausentes e que se habilitarán os medios materiais e técnicos precisos para posibilitar a votación en urna. Ben, isto é así. Polo tanto, debemos de traballar nesta dirección, sabendo da complexidade que leva consigo esta materia e contando para iso coas achegas dos órganos de representación da emigración. Nesta liña, o propio acordo do Goberno galego marca un compromiso, o compromiso do Goberno da Xunta de Galicia para traballar no asentamento desa normativa e polo tanto garantir o voto dos electores emigrantes. Polo tanto, estamos traballando nese sentido nesta Cámara, e así llo fixemos saber á Comisión de Traballo e Asuntos Sociais do Congreso dos Deputados e ao propio Ministerio de Asuntos Exteriores.

En relación co voto das 6.000 ou 10.000 persoas que veñen reclamando con toda xustiza unha solución, que son os

galegos que basicamente están embarcados nos buques de altura e longa distancia, que chegan a ter imposibilidade material e efectiva de exercer o seu dereito a voto, co cambio do escenario político xurdido despois das pasadas eleccións xerais, o Goberno central, o actual Goberno, constituíu no mes de xullo do 2005 un grupo de traballo para analizar a problemática do exercicio de voto deste tipo de poboación, de mariñeiros, no que estarían especialmente os traballadores do mar, para levar a cabo as correspondentes propostas de modificación normativa que permitan o exercicio de voto. Nesa liña o que lle podo asegurar é que o Goberno galego colabora activamente co Goberno de España para garantir e cumprir o acordo de goberno da Xunta de Galicia, de tal maneira que ese colectivo tan importante para Galicia vexa recoñecido o seu dereito lexítimo ao voto en democracia.

Moitas grazas.

A señora PRESIDENTA: Moitas grazas.

Rolda de réplica.

Ten a palabra o señor Aymerich Cano.

O señor AYMERICH CANO: Moitas grazas, señora presidenta.

Señor presidente, brevemente. Desde logo é unha boa noticia que o proxecto de Estatuto dos Cidadáns Españois no Exterior, en tramitación no Congreso –xa leva tempo tramitándose–, contemple esta previsión. O que sucede é que deberíamos, penso, dentro do que é o respecto institucional e o ámbito que corresponde ás Cortes Xerais, lembrarlles que corre certa présa, porque, primeiro, haberá que aprobar o Estatuto dos Cidadáns Españois e logo haberá que proceder a modificar a Lei orgánica do réxime electoral xeral. Entón, non sei se imos estar a tempo ou non, por exemplo, de que este problema, no que se refire ao voto emigrante, estea solucionado de aquí ás municipais. Penso que deberíamos poñernos esa meta, e tamén aquí fago votos para que sexa así para o futuro referendo de ratificación do novo estatuto de Galiza

E polo que se refire aos mariñeiros embarcados en buques de altura, un pouco o mesmo; é dicir, vaise cumprir un ano da constitución desa comisión e algunhas das propostas de

modificación normativa foron transcendendo, como o voto electrónico ou converter o capitán, dalgunha forma –tamén pola especial autoridade que lle recoñece a lei marítima–, en garante do proceso, en presidente dunha mesa electoral que se constituiría en cada barco, pero tamén corre prisa para que se poidan substanciar e se poidan facer de dereito positivo a través da Lei orgánica do réxime electoral xeral. Desde logo que nos temos que empregar –e isto si que nos corresponde a nós, e ninguén nos vai facer ese traballo– como Parlamento a que antes das próximas eleccións autonómicas teñamos a Lei de eleccións ao Parlamento de Galicia reformada neste sentido tamén, recoñecendo o dereito a voto dos mariñeiros, recoñecendo a igualdade de condicións cos que residimos no interior do país e o procedemento de votación limpo, seguro e garantista para os emigrantes galegos.

Máis nada e moitas grazas.

A señora PRESIDENTA: Moitas grazas, señor Aymerich.

Rolda de peche.

Ten a palabra o señor presidente da Xunta.

O señor PRESIDENTE DA XUNTA DE GALICIA (Pérez Touriño): Comparto plenamente a necesidade de acelerar o máximo posible toda a tramitación, que sen dúbida é complexa e que necesita desa aprobación do Estatuto dos Cidadáns no Exterior, que, créame, señoría –estou seguro de que coincide tamén–, é un gran paso adiante para afrontar de xeito horizontal, integral, global e decidido os dereitos ata agora moitas veces esquecidos con rango de lei, polo tanto, con rango de dereitos de cidadanía, non de outorgamento desde tal ou cal goberno, dos residentes españois no exterior. E un dereito fundamental é a implantación do dereito a voto en urna; un voto en urna que, evidentemente, ten dificultades de tipo técnico orzamentario pero que é necesario acometer coa urxencia que vostede reclama. Estamos traballando nesa dirección: na dirección de impulsar, de acelerar e de tratar de que esa norma saia adiante o antes posible. Nese sentido quero anunciarlle que desde aquí mesmo, desde o Goberno da Xunta de Galicia, está posta en marcha a creación dun grupo de traballo para estudar as concentracións de poboación inmigrante nas demarcacións consulares, así como a necesidade de garantir tecnicamente o voto en urna desta poboación. Trátase de gañarlle tempo ao tempo e de ir ana-

lizando xa a posta en práctica efectiva do voto en urna alí onde hai unha concentración importante nas demarcacións consulares por parte de poboación galega residente no exterior. Deste xeito estaremos en condicións de gañar tempo, de adiantar e ter o traballo realizado para cando teñamos a modificación, por fin, á que vostede alude, en vigor.

Desde a Secretaría Xeral de Emigración estase traballando nun manual sobre o voto dos galegos e das galegas residentes no exterior para explicar os dereitos, para explicar as modalidades de voto e, en definitiva, para axudar a un labor que debe servir para garantir plenamente a transparencia plena e a independencia plena do exercicio de voto.

E en relación co que ten que ver co voto dos mariñeiros, quero insistir, señoría, en que estamos xustamente traballando nesa dirección, para que ese grupo de traballo ao que me refería anteriormente, formado polo Ministerio de Asuntos Exteriores, Correos, a oficina do Censo Electoral e o Ministerio do Interior, que son basicamente as autoridades responsables e os órganos afectados por esta implantación, insista, reitere e traballe na dirección de que se tome a decisión canto antes.

E para concluír, ao que si me comprometo con toda claridade é a que esta Cámara, desde a maioría parlamentaria que sustenta a acción do Goberno, e estou seguro de que co –...– da oposición, terá feitos os deberes para os comicios autonómicos e teremos modificada a nosa propia Lei de réxime electoral.

Moitas grazas.

A señora PRESIDENTA: Moitas grazas, señor presidente.

Pregunta dirixida ao Sr. presidente da Xunta de Galicia, de D. Alberto Núñez Feijoo, do G.P. Popular de Galicia, sobre o balance do Sr. presidente da Xunta de Galicia respecto da política de vivenda que está a aplicar o Goberno galego

A señora PRESIDENTA: Para formular a pregunta, ten a palabra o señor Núñez Feijoo.

O señor NÚÑEZ FEIJOO: Moitas grazas, señora presidenta.

Señor presidente, eu empezo recoñecendo a gran expectación que levantou a política de vivenda deste Goberno,

igual que a gran expectación que supoño que levantarán as manifestacións do portavoz do BNG en relación coa posible fraude nas eleccións de xuño no voto do emigrante; supoño que a mesma expectación.

Pero, en fin, avaliemos as medidas tomadas antes de tomar posesión –valla a redundancia– o seu Goberno en relación coa vivenda. En primeiro lugar: pacto de goberno. Unha liña exactamente: Construiremos 25.000 vivendas, das cales 7.000 serán en aluguer –conciso–. Segunda medida: creación da Consellería de Vivenda, señoría, anteriormente había un alto directivo que se encargaba da vivenda. Neste momento hai unha conselleira, un secretario xeral e dous directores xerais. Multiplicáronse o número de altos cargos. Os gastos de persoal –parecía suficiente o número de altos cargos– incrementáronse nun 54%; de seis millóns de euros a dez millóns de euros. E, por último, os gastos de vivenda incrementáronse no IPC máis tres puntos. Polo tanto, señoría, esta consellería significa máis administración pero menos vivenda. Pero o que é máis preocupante: é unha consellería mutilada, señoría. ¿Por que? Porque probablemente unha consellería que queira facer vivendas debe ter competencias en materia de urbanismo. Eu comprendo, señoría, que vostede quería as competencias en materia de urbanismo, pero non llas deron. Parece que alguén quere que a consellería non funcione. E creo, señoría, que se está conseguindo.

Imos avaliar, se lle parece, o que fixo esta consellería un ano despois. Creo de verdade, señoría, que hai un caos na xestión da consellería. Mire, é a única consellería que non ten organigrama, relación de postos de traballo. É a única consellería, ou unha das consellerías, onde houbo un conflito importante dos directivos. De feito o secretario xeral non aguantou nin seis meses no seu posto. E ollo a este dato, señoría: esta consellería deixou sen executar o 40% do presuposto; 10.000 millóns de pesetas, 60 millóns de euros, quedaron sen executar o pasado exercicio, señoría.

Segunda cuestión: a paralización da consellería. Créame, señoría, houbo paralización durante catro meses de todas as axudas do plan estatal; non se puideron pedir porque non se aprobou o decreto. Paralización ao día de hoxe: ningunha axuda se pode pedir para a rehabilitación de cascos históricos, ningunha se pode pedir para a rehabilitación de vivendas no medio rural. E outro dato importante, señoría: nun

ano o *Diario Oficial de Galicia* non sacou unha soa obra de vivenda de promoción pública. Neste primeiro ano, a Xunta de Galicia non licitou unha soa obra de protección pública, señoría. Este creo que é un dato que o debe facer reflexionar.

Balance, señoría: os indicadores empeoraron. Hai un maior incremento de prezos, señoría. ¿Sabe vostede que Galicia en marzo de 2006 era a primeira comunidade autónoma do Estado en incremento de prezos co 15%? ¿Sabe vostede –como lle acabo de dicir– que deixou o seu Goberno de investir 60 millóns de euros en vivenda? ¿Sabe vostede que o seu Goberno non licitou unha soa vivenda de promoción pública durante o seu mandato?

Señoría, por último, non hai ideas, e ese é o problema. O problema dun goberno é cando non ten ideas. Agora ben, quero dicir que en vivenda si houbo dúas ideas, quero ser franco: os minipisos de 40 metros para maiores e mozos, con salas conxuntas de lecer. Eu espero que na fin de semana a eses mozos non se lles ocorra facer botellón diante dos maiores, señoría, (*Aplausos.*) porque ese sería un pequeno escándalo. E, por último, señoría, as casas contedor. Esa tamén é unha gran proposta, sen dúbida. A verdade é que veu da Consellería de Vivenda, pero supoño que sería probablemente porque estivera pactado. A Xunta apoia converter contedores en pisos asequibles. Pero, señoría, ¿sabe o problema?, que se trata de contedores usados. Señoría, con todos os respectos, este é o noso balance, e agora esperamos o seu.

Moitas grazas. (*Aplausos.*)

A señora PRESIDENTA: Moitas grazas, señor Núñez Feijoo.

Para o turno de resposta ten a palabra o señor presidente da Xunta.

O señor PRESIDENTE DA XUNTA (Pérez Touriño): Señor Feijoo, efectivamente, este Goberno está en condicións, apenas un ano despois da súa andadura, de facer, como pide, un balance da súa política en materia de vivenda; pero un balance sobre a base de feitos non sobre a base de retórica e declaracións no papel. Voulle dar feitos, señoría.

O pasado 26 de xaneiro aprobamos o Plan de vivenda 2005-2008, no que, por certo, se introducen importantes

novidades sobre o plan elaborado polo Goberno anterior. Equiparamos fiscalmente a vivenda protexida que se constrúe en Galicia coa do resto do Estado –anteriormente non estaba–, de tal xeito que tanto promotores como compradores quedan exentos do pago do imposto de transmisións patrimoniais e actos xurídicos documentados, e terán unha bonificación do 50% no IBI. Algo que vostedes non fixeran e que estaba penalizando *de facto* tanto aos compradores como aos promotores de vivenda protexida. Ao mesmo tempo –señor Feijoo, datos–, con cargo a este novo plan xa se teñen cualificadas 2.626 vivendas protexidas feitas polo sector privado, ás que hai que sumar neste momento 1.489 vivendas protexidas promovidas directamente pola Consellería de Vivenda e Solo e 681 máis, tamén do mesmo tipo de vivendas protexidas, promovidas pola consellería; o que fai un total de 4.796 actuacións de vivenda protexida no día de hoxe en once meses de actuación.

Do mesmo xeito creamos un rexistro único de demandantes de vivenda protexida, que anteriormente non existía, e estará funcionando a finais de ano. Un rexistro que permitirá, en primeiro lugar, planificar mellor a oferta en función da demanda, e dará, sobre todo, transparencia, señor Feijoo, aos procesos de adjudicación de vivenda protexida. Habilítase por primeira vez unha axuda para as vítimas de violencia de xénero; para as familias con un ou con dous fillos que, pese a ser as máis numerosas, ata agora carecían dunha subvención específica para esta circunstancia; e establécese, ademais, unha axuda específica, acumulable ás outras, para os mozos e as mozas de ata 35 anos e para os maiores de 65 anos pola adquisición de vivendas de entre 40 e 45 metros cadrados útiles e dun só dormitorio. Por certo, cáusanme bastante estrañeza os seus comentarios cando o Decreto de habitabilidade, aprobado por vostedes, permitía vivendas dun só dormitorio de 26 metros cadrados, señor Núñez Feijoo.

Ademais, o Goberno xa está no desenvolvemento do pacto local –que vostedes foron incapaces de facer en deza seis anos–, para establecer coa Fegamp un pacto polo solo coa finalidade de liberar solo con máis rapidez destinado á construción de vivenda protexida, que é o pilar fundamental da política deste Goberno. E temos neste momento en marcha importantes actuacións de solo residencial para albergar máis de 7.000 vivendas protexidas. Pódolle dar os datos exactos de onde están e do número de vivendas protexidas que se liberan a partir dese solo.

Estamos pondo en marcha un programa potente de políticas de rehabilitación conxuntamente co Ministerio de Vivenda. Están en marcha máis de 1.407 actuacións de rehabilitación en distintos concellos do país, non só nos cascos vellos das cidades senón tamén de renovación urbana en zonas onde predominou ata o de agora un urbanismo literalmente salvaxe e especulativo. E estamos –como sabe ben a súa señoría– a promover unha política activa de respecto á paisaxe, nunha loita contra o feísmo, na que está comprometido non só a Consellería de Vivenda senón o conxunto do Goberno que presido.

E, por último, para concluír, señor Feijoo, si, puxemos en marcha un novo programa de vivendas en aluguer, porque queremos, xunto coa vivenda protexida e xunto coa rehabilitación, promover vivenda en aluguer especialmente para a xente que ten máis necesidade dese aluguer, cun carácter eminentemente social, non como era antes; despois de ter que suspender a antiga bolsa de aluguer, señor Núñez Feijoo, da que vostede foi responsable directo politicamente, polas numerosas irregularidades detectadas e por terse convertido nun auténtico fiasco de descontrol e de desviación presupostaria a súa política, señor Feijoo. *(Aplausos.)*

A señora PRESIDENTA: Moitas grazas, señor presidente.

Ten a palabra o señor Núñez Feijoo para a rolda de réplica.

O señor NÚÑEZ FEIJOO: Eu creo que está claro, señoría, a súa política de vivenda consiste en protexer a paisaxe.

Señoría, vostede non contesta. Tampouco lle contestou ao señor Aymerich, que lle dixo claramente que nestas eleccións en xuño se puido cometer unha fraude no voto emigrante. Supoño que vostede estará pensando realmente se a súa presidencia ou o seu Goberno están afectados por esta fraude. *(Interrupcións.) (Aplausos.)*

Señoría, evidentemente, vostede contéstame cun plan, pero os galegos están fartos de plans e queren vivendas. Señoría, cero vivendas de promoción pública. Vivendas sociais: non engane a ninguén, non fale vostede de vivendas protexidas, fale vostede das rendas baixas, fale vostede de vivendas sociais. ¡Cero; vostede cero, señoría! E devolveu 60 millóns de euros, 10.000 millóns de pesetas, señoría. Iso é o que hai.

E fala vostede de que descubriu a violencia de xénero. ¡Pero se había pisos dedicados ás mulleres con estes problemas, señoría, (*Interrupcións.*) feitos pola Xunta de Galicia! Fala vostede de vivendas en aluguer. Eu xa sei, señoría, que na réplica vai falar vostede da vivenda en aluguer. Mire, señoría, voulle dar os datos do Instituto Nacional de Estatística. Non crea que porque vostede vexa na súa televisión algunhas noticias son verdade... (*Interrupcións.*) –grazas, presidenta, por deixarme falar, moitas grazas–. Mire, Instituto Nacional de Estatística –supoño que neste cre–: “O incremento do prezo das vivendas en aluguer en España, o 4,3; e en Galicia, o 3,6 no ano 2005”. Non se deixe vostede embaucar por cifras falsas, señoría. As vivendas en aluguer non subiron en Galicia por riba da media do Estado, baixaron en relación coa media do Estado un 16%.

Señoría, a súa prioridade, ¿cal é? Eu voulo dicir, señoría: a súa prioridade, probablemente, en política de vivenda é facer beirarrúas. Catro millóns de euros a un concello para facer beirarrúas. ¿Sabe cantas subvencións en aluguer se farían con estes 4 millóns de euros? Pois 1.800 familias poderían ter unha subvención en aluguer cos 4 millóns de euros. (*Aplausos.*)

Señoría, eu non lle vou dicir que tome unha decisión drástica na Consellería de Vivenda, porque nunca lle pedirei unha cousa que non pode facer. (*Risos.*) Tampouco lle vou pedir, señoría, que fale coa conselleira de Vivenda para que o seu equipo empece a funcionar, porque sei que iso tampouco o pode facer. Pero si lle pido unha cousa, señoría, fale vostede co señor vicepresidente –el si o pode facer– e pído-lle que poñan orde na Consellería de Vivenda.

Moitas grazas, señoría. (*Aplausos.*)

A señora PRESIDENTA: Grazas, señor Feijoo.

Para a rolda de peche ten a palabra o señor presidente da Xunta.

O señor PRESIDENTE DA XUNTA (Pérez Touriño): Grazas.

Señoría, a súa actitude a verdade é que ás veces –refírome de entrada a aquilo da fraude electoral sobre a que está constituído este Goberno– raia nunha especie de desafío, como mínimo, á intelixencia política, e o seu comportamen-

to –logo falarei diso–, probablemente á ética política. Porque, en fin, creo que é bastante grosso o que acaba de dicir aquí, e vostede... Esta Cámara está para dicir o que un queira. Vostede non pode, a estas alturas da vida... Sei que tiveron a tentación, que viven na tentación permanente, de deslexitimar os procesos democráticos. (*Interrupcións.*) (*Aplausos.*) E o 29 de xuño votaron os cidadáns, señor Núñez Feijoo. Cálmese. Sei ben que estar na oposición probablemente é duro, pero vostede ten que construír ese traballo porque foi o que lle encargaron os cidadáns; polo tanto, asuma a súa responsabilidade dunha vez, señor Núñez Feijoo.

Mire, en relación coa política de vivenda creo que dei aquí unha información clara, nítida e contundente dos piores, do exercicio e do balance extraordinariamente positivo que o Goberno presenta tamén nesta materia, en relación coa vivenda protexida, en relación coa rehabilitación e en relación co aluguer. E, sinceramente, sabe ben toda a Cámara que eu como presidente non teño un talante caracterizado por construír a axenda política sobre a revisión do pasado senón sobre o compromiso de construír –a ser posible xuntos e dialogadamente– o futuro deste país. Pero dado que vostede fai un permanente desafío á intelixencia política e vén aquí xustamente a escoller a materia de vivenda, téño-lle que dicir cinco ou seis cousas, señor Núñez Feijoo, con contundencia, con claridade e con responsabilidade. A continuación vostede terá a oportunidade e o tempo, todo o do mundo, para clarificar a súa actuación diante desta Cámara. Porque, señoría, vostede é responsable político directo dunha transgresión grave e esencial do decreto da Xunta regulador da bolsa de aluguer, dunha reiterada e sistemática vulneración do seu artigo 44, que estipulaba a obrigatoriedade de vincular os alugueres a un tope de renda mensual subvencionable polo decreto –vinculábao obrigatoriamente–, permitindo que fose unilateralmente fixada polos propietarios, con máis de 1.500 expedientes irregulares.

Señor Núñez Feijoo, vostede é responsable político directo de que mediante este sistema os prezos de aluguer sobardaran en moitas ocasións o 100% estipulado legalmente e chegaran ao 300% en boa parte dos casos. Vostede é responsable político directo, señor Núñez Feijoo, dun grave quebranto á facenda pública de Galicia (*Aplausos.*) por un valor de 892.000 euros no último ano, un exceso de gasto inxustificable e unha desviación presupostaria sobre do previsto. Vostede, señor Núñez Feijoo, é responsable directo

politicamente de montar un tenderete de asistencias técnicas fóra do control real do sistema público deste país. Vostede, por certo, non lle ten dado a esta Cámara –e sábeo– toda a información que vostede ten sobre esas asistencias técnicas, algo que, por certo, esta Cámara merece coñecer. Vostede converteu nunha auténtica fraude política e nun auténtico engano masivo social a súa política de vivenda. Esa é a realidade, señor Núñez Feijoo. Esa é a herdanza que recibimos. E nese contexto, baseados no informe da Asesoría Xurídica, baseados na auditoría correspondente –está a información á disposición da Cámara–, baseados en todo iso, tivemos que suspender o programa de aluguer para poñer en marcha un novo programa de vivenda que agora si ten un eminente carácter social, deseñado para favorecer o acceso á vivenda das rendas con máis dificultades, controlado publicamente e transparente. Porque transparencia e política social son os signos claros da política de vivenda deste Goberno.

Nada máis e moitas grazas. *(Aplausos.)*

A señora PRESIDENTA: Grazas, señor presidente.

Pasamos agora á seguinte pregunta.